

新鄭縣志卷二十五目錄

藝文志五

宋

尹洙

志古堂記

補

韓琦

三賢堂贊

歐陽文忠公墓誌銘

補

工部尚書崔公行狀

補

比部員外郎崔君墓誌銘

補

歐陽修

陳文惠公神道碑銘

吳正肅公墓誌銘

蘇軾

鄭伯克段于鄆論補

鄭伯以璧假許田論補

驪非論補

留侯論補

蘇軾

子產論補

韓論補

歐陽文忠公神道碑銘

黃庭堅

具茨頌補

封植蘭蕙手約補

晁補之

寂默居士晁若愚表補

喻汝礪

具茨晁先生詩序

朱熹

書黃帝諸書後

晁公武

陰符經跋

鄧析子跋

陳傅良

張良論

高似孫

列子冲虛經跋

握奇經跋補

鄧析子跋補

韓非子跋補

張栻

張子房論

真德秀

鄭子產論補

黃震

書列子後補

書韓非子後補

劉克莊

楊通老移居圖跋補

元

王磐

許魯齋先生像贊

補

鄭冲霄

許文正公祠堂記

姚珩

新鄭縣社稷壇碑記

補

吳萊

陰符經註序

補

新鄭縣志卷之二十五

藝文志五

宋

志古堂記

尹

洙

河南人

河南劉伯壽宰新鄭之二年搆堂于縣署既成謂予曰我官事已則休沐于是早夜以思盖有歎焉歎乎功名之不可期文章之不世傳我思古人力之而後已遂名堂曰志古余嘉其有是志從而爲之詞曰夫古人行事之著稱之曰功名古人立言之著稱之曰文章盖其用也行事澤當時以利後世世傳焉從而爲功名其處也立言矯當時法後世世傳焉從而爲文章行事立言不與功名文章期而卒與

俱焉後之人欲功名之著忘其所以爲功名欲文章之傳忘其所以爲文章故雖得其欲而戾于道者有焉如有志于古當置所謂文章功名務求古之道可也古人奚遠哉得諸心而已心無苟焉可以制事心無蔽焉可以立言惟無苟然後能外成敗而自信其守也惟無蔽然後窮見至隱而極乎理也信其守者本乎純極于理者發乎明純與明是乃至古人之所至也至于文章功名從焉而不有之也伯壽喜予言刻之于堂以自儆

見宋文選

三賢堂贊

有敘

韓

琦人

文正王公塋鄭州新鄭縣之臨洧鄉而與鄭相子產唐相裴度之塚相左右其弟刑部侍郎致仕子融乃繪三公之像置

於墳之僧院而屬余爲辭故爲三賢贊云

猗歟國公惟鄭卿臣屈佐列國道尊四鄰鄉校勿毀否吾可詢輿誦
勿斥誨吾益諄不改其度而終感民及其亡也如喪所親昔吾夫子
事若天倫曰古遺愛疇云不仁東里之舊清風未泯九原可作吾從
惠人

右子
產贊

猗歟裴公唐相之賢忠義獨出誠貫於天明哉章武言行計然誓平
蔡賊不與俱全卒殲大憝再清幅幘身繫安危凡二十年江左王謝
胡能比旃晚留東都放懷林泉進退之節公無少愆使公而在吾其
執鞭

右裴
公贊

猗歟王公佐我宋基股肱兩朝言臯行夔獻后稱制政由房帷公時

挺然惟正是毘黜姦進良遂光重離其重如山烏可妄移其平如衡
烏可妄欺被公恩者終身莫知噫公之道真相之爲公今亡矣吾安
倣之

右王公贊
見安陽集

故觀文殿學士太子少師致仕贈太子太師歐陽公墓誌銘

韓琦

熙寧五年閏七月二十三日觀文殿學士太子少師致仕歐陽公薨
于汝陰之私第年六十六上聞震怛不視朝贈公太子太師卹後加
賻不與常比天下正人節士知公之亡罔不駭然相顧痛失依仰其
孤寺丞君乃以樞密副使吳公所次功緒并致治命以遺其爲請寤
惟當世能文之士比比出公門下不屬於彼而獨以見屬豈公素蒙

其愚謂能直筆足信後世耶此其敢辭公諱修字永叔唐太子率更
令詢四世孫琮嘗爲吉州刺史又八世生萬復爲吉之安福令子孫
因家焉曾祖諱柳安福六世孫也孝悌之行鄉里師服南唐爲武昌
令累贈太師中書令曾祖妣劉氏追封楚國太夫人祖諱偃強學善
屬文南唐時獻所爲文十餘萬言試補南京衙院判官累贈太師中
書令兼尚書令祖妣李氏追封吳國太夫人父諱觀性至孝力學咸
平中擢進士第當官明而尚恕每決重辟尤加審謹苟理有可脫必
平反之終泰州軍事判官累贈太師中書令兼尚書令追封鄭國公
自公祖始徙居吉水後吉水析爲永豐今爲永豐人公四歲而孤母
韓國太夫人鄭氏守志不奪家雖貧力自營贍教公爲學公亦天資

警絕經目一覽則能誦記爲文下筆出人意表及冠聲問卓然天聖中舉進士凡兩試國子監一試禮部皆爲第一逮崇政試雖中甲科人猶以不魁多士爲恨初補西京留守推官洛尹文康王公知非常才歸薦于朝景祐初召試遷鎮南軍節度堂書記館閣校勘時文正范公權尹京邑以直道自進每因奏事必陳時政得失大忤宰相意斥守饒州諫官不敢言公貽書責之坐貶峽州夷陵令余安道尹師魯繼上書直范公復被逐當時天下以四賢稱之俄徙光化軍乾德令改武城軍節度判官康定初召還復館閣校勘遷太子中允預修崇文總目成改集賢校理同知太常禮院請外補通判滑州事應歷初仁宗御天下久周悉時敝重以西師未解思欲整齊衆治以完

平登進輔臣必取人望收用端鯁以增諫員公首被其選擢太常丞
知諫院事賜五品服未幾同修起居注公素稟忠義遭時遇主自任
言責無所顧忌橫身正路風節凜然時正獻杜公文正范公今司空
富公皆在二府公每勸上乘間延見推誠咨訪上後開天章閣屢召
諸公詢究治本長策大議稍稍施用紀綱日舉僥倖頓絕小人始大
不喜相與巧詆必期破壞公常極力左右之俄拜右正言知制誥賜
三品服大臣有建白請廢麟州徙其治于合河津以省餽餉者命公
親往相視使回奏曰麟州天險正據要害不可廢第減其兵駐並河
諸堡有警呼集數舍之近耳兵旣減糧自不乏詔從之又奏忻代州
苛嵐火山軍並邊民出始潘美爲帥患虜時入寇徙其民以空之遂

號禁地自景德通好我雖循舊而虜人盜耕不已計募民計頃出丁爲兵量入租粟以耕之歲可得數百萬斛邊用給矣不然他日必盡爲虜人所有時并帥耻謀不自己沮撓久之其後卒如公請凡賦歛過重民所不堪者又奏罷十數事疲俗以安四年秋北虜盛兵雲州聲言西討朝廷疑其有謀議選文武材臣密爲經畫二府請輟公以往卽以公爲龍圖閣直學士河北都轉運使公至則區別官吏使能者盡力均徙財用而邊計有餘奏廣御河漕運造鑠楸船以絕侵盜置都作院于磁相州一道兵械悉仰給焉方條列北方利病欲大爲措置會文公范公與同時入輔者終爲讒說所勝相繼罷去一時進用者皆指之爲黨公復慨然上書極言論救執政與其朋益怒協力

擢之初公有妹適張龜正龜正亡無子妹挈前壻所生孤女以歸及
筭公爲選宗人展以嫁之會張氏以失行繫獄言者乘此欲並中公
復捃張氏貲產事遂興詔獄窮治上爲命內臣監劾卒辨其誣猶降
授知制誥知滁州事執政意不快撫勘官與監劾內臣細故皆被責
八年春就改起居舍人知揚州事踰年徙知潁州事皇祐初復龍圖
閣直學士二年秋移知應天府兼南京留守司事歷尚書禮部吏部
郎中丁太夫人憂去職服除入見上怪公鬚髮盡白惻然存撫恩意
甚厚命判吏部流內銓素忌公者恐將大用乃僞爲公疏請汰內臣
以邀衆怒有選人胡宗堯者當引對改官前任本州嘗以官舟假人
已而經赦去官止得循資公與判南曹官對日取旨上欣然令改官

宦者楊承德密奏曰崇堯翰林學士宿之子有司援救之私也遂出
公知同州事物論不平上亟開懣留公刊修唐書俄入翰林爲學士
史館修撰勾當三班院至和二年夏請郡改侍讀學士知蔡州事留
不行復除翰林學士判太常寺兼禮儀事遷右諫議大夫嘉祐三年
夏兼龍圖閣直學士權知開封府事前尹孝肅包公以威嚴得名都
下震恐而公動必循理不求赫赫之譽或以少風采爲言公曰人材
性各有短長吾之長止于此惡可勉其所短以徇人邪旣而京師亦
治四年春請罷府事改給事中充羣牧使唐書成拜禮部侍郎俄兼
翰林侍讀學士五年冬以本官爲樞密副使明年秋叅知政事英宗
登極遷戶部侍郎治平初特轉吏部侍郎今上嗣位改尚書左丞公